

Eqqissimatitsinermut Avatangiisinullu Ataatsimiititaliap

Namminersorlutik Oqartussat ingerlataanni errorsinermut qaqorsaait aammalu kingunerutit taamaallaat avatangiisinut innarliisuunngitsunik nalunaaqtsikkanik aammalu tipigissaateqanngitsunik atuilernissaat pillugu Naalakkersuisut peqquneqarnissaannik Inatsisartut aalajangiiffigisassaattut siunnersuut. Tamatuma ilutigisaanik inoqutigiinnut inuiaqatigiit errorsinermut qaqorsaatinik aammalu kingunerutit avatangiisinut innarliisinnaasunik atuinerisa millisinnissaat anguniarlugu Naalakkersuisut paasititsiniaanermik ingerlataqarnissaannik peqquneqassapput. (Inatsisartunut Ilaasortaq Sofia Geisler, Inuit Ataqtigiit)

Pillugu

ISUMALIUTISSIISUTAA

Siunnersuutip aappassaanneerlugu oqaluuserineqarnerani saqqummiunneqartoq

Eqqissimatitsinermut Avatangiisinullu Ataatsimiititaliap suliarinninnermini ukuningga inuttaqarpoq:

Inatsisartunut ilaasortaq Nikkulaat Jeremiassen, Siumut, siulittaasoq
Inatsisartunut ilaasortaq Aqqa Samuelsen, Inuit Ataqtigiit, siulittaasup tullia
Inatsisartunut ilaasortaq Mikivsuk Thomassen, Inuit Ataqtigiit
Inatsisartunut ilaasortaq Simigaq Heilmann, Demokraatit

Ulloq 16. oktober 2019 siunnersuutip siullermeerlugu oqaluuserineqareernerani siunnersuut ataatsimiititaliamit misissorneqarpoq.

1. Siunnersuutip imarisaa siunertaalu

Qaqorsaait kingunerutillu akuutissartaqanngitsut tipigissaatitaqanngitsullu kisimik Namminersorlutik Oqartussat suliffeqarfutaanni atorneqalernissaannut qulakkeerinninissamat Naalakkersuisut peqquneqarnissaannik aalajangiiffigisassatut siunnersuutikkut siunertarineqarpoq. Tamatumunnga atatillugu innuttaasut qaqorsaatinik kingunerutinilli avatangiisinut mingutsitsinnaasunik atuinerisa annikillisinneqarnissaat siunertaralugu Naalakkersuisut paasisitsiniaassaput. Siunnersuummi siunertarineqarpoq akuutissat arrortikkuminaatsut atorneqarnerisa imaanullu kuutiinnarneqartarinerisa annikillisinneqarnissaat.

2. Siunnersuummik ataatsimiititaliap suliaqarnera

Avatangiisimut mingutsitsinngitsunik tipigissaatinillu akulinnik atuinngitsunik Namminersorlutik Oqartussat suliffeqarfiutaasa atunerisa annikillisarneqarnissaanik siunnersuummi matumani siunertaqarnermut tapersersuilluni ataatsimiititaliaq aallarniutigalugu oqaaseqassaaq. Soorlu siunnersuummi atuarneqarsinnaasoq kingunerummik atuneq pisariaqanngilaq peqatigisaanillu kingunerutit avatangiisimut sapingalinnullu ajoqutaapput. Qaqorsaatilik avatangiisimut mingutsitsinnginnermut nalunaaqutsersukkanik tipigissaatitaqanngitsunillu atuinnermut nuunneq tamatumunnga atatillugu pissusissamisoortutut isigineqarpoq.

Imermut atoriikkamut saliivimmik peqartoqanngimmat pingaartumillu imermut atorineqareersumut saleeqqissaariveqannginnera pissutaalluni erngup atoriikkap akuutissanik akoqartup imaanut kuutsiinnarneqartarnera ataatsimiititaliamit erseqqissassallugu pingaartinneqarpoq. Taamaattumillu nunatsinni pingaaruteqarpoq kuutsittakkap taassuma annikillisarneqarnissaanik suliniuteqarnissap qulakkeerneqarnissaa.

2.1 Siunnersuutaqqaartoq

Siunnersuutip atuutilersinneqarneratigut Naalakkersuisut pisiniartarnermut suleriutsinullu politikkiat ilanngulluni allanngussasoq siunnersuummut tunngavilersuutini ilanngullugu allaaserineqarsimasoq ataatsimiititaliamit maluginiarneqarpoq. Siunnersuutip taasissutissartaani taama kissaateqarneq ersernerluppoq, taamaattoqassappallu inatsit atuutilissappat Naalakkersuisut namminneq aalajangersinnaavaat malissallugu malissannginnerluguluunniit. Pissusissamisuusarli allannguutissatut siunnersuummi kissaatigineqartoq malillugu avatangiisinut mingutsitsinngitsunik qaqorsaatilik kingunerutinillu atuinissaq qulakkeerniarlugu pisiniartarnermi suleriuseqarnermilu politikkip allanngortinnissaa.

2.2 Allannguutissatut siunnersuut

Siunnersuutip siullermeerneqarnerani Naalakkersuisut allannguutissatut siunnersuummik saqqummiussaqrput:

”Naalakkersuisut errorsinnermut qaqorsaatilik kingunerutinillu atuneq pillugu paasititsiniaanissamut ilagitillugu errorsinnermut qaqorsaatilik kingunerutinillu avatangiisinut mingutsitsinngitsutut nalunaaqutsikkanik tipigissaatitaqanngitsunillu atuinissamut Namminersorlutik Oqartussat sullissiviinut kommuninullu kaammattuinnissamut peqquneqarnissaannik Inatsisartuni aalajangiiffigisassatut siunnersuut.”

Qaqorsaatit kingunerutinillu pineqartut kingunipiloqartarnerat pillugit Naalakkersuisut siunnersuuteqartoq isumaqatigerpasippaat. Tamanna tunngavigalugu allannguutissatut siunnersuummi taaneqartutut Naalakkersuisut siunnerfilimmik suliffeqarfinni kommuninilu

inuttaasut tamaasa paasisitsiniaaffigalugit suliniuteqarnissaat ataatsimiititaliamit tatigineqarpoq.

Tamatuma saniatigut allannguutissatut siunnersuut ima isumaqarpoq, tamatuma qulakkeernissaanut Naalakkersuisut suliffeqarfiutitik qaqorsaatinik kingunerutinillu avatangiisinut mingutsitsinngitsunik nalunaaqutsersimasunik kiisalu tipingissaatitaqanngitsunik taamaallaat atuinissamut Naalakkersuisut peqquneqassallutik. Allannguutissatut siunnersuummi kaammattuuteqarnermi kommunit ilanngunneqarput, siunnersuutaaqqaartumi Namminersorlutik Oqartussat suliffeqarfiutaat kisimik pineqaraluartut. Allannguutissatut siunnersuutip kaammattuinnissamik oqaasertalersimaneqarnera tunngavigalugu qulakkeerneqarsinnaanngilaq qaqorsaatinik kingunerutinillu atuinerup allanngortinneqarnissaa.

Allannguutissatut siunnersuut paasisitsiniaanermut ingerlanneqareersumut “Pinngortitap illersuisui”-nut kaammattuineq ilanngunneqassaaq. Paasisitsiniaanermi sammineqarpoq Inuttaasut ulluinnarni pinngortitamik mianerinninnissaat. Qaqorsaatinik kingunerutinillu atuneq tassunga ilanngutissallugu piukkunnarpoq. Toqqaannartumik inuttaasut qaqorsaatinik kingunerutinillu avatangiisinut mingutsitsisumik atuinerisa annikillisarneqarnissaa pillugu nutaamik immikkut paasisitsiniaasoqanngikkaluarluni paasisitsiniaanermut ingerlanneqareersumut kaammattuutip ilanngunneqarnissaa tapersorsorneqarsinnaavoq akerlerineqarluniluunniit. Tassa, oqariartuutigineqartoq, oqariartuutigineqartunut allalissuarnut ilanngunneqaruni sanngiillisutut isikkoqarsinnaavoq. Paarlattuanillu aamma oqariartuutigineqartoq nukittorsarneqarsinnaavoq pioreersumut “Pinngortitap illersuisui”-nut innuttaasunillu ilisarineqarsinnaasumut ilanngunneqaruni.

Qanorikkaluarpalluunniit naatsorsuutigineqartariaqassaaq qaqorsaatinik kingunerutinillu avatangiisimut mingutsitsisunik inuttaasut atuinerata annikillisarneqarnissaannik oqariartuut paasisitsiniaanernut pioreersunut ilanngunneqartillugu aningaasatigut kingunissaritinneqartut annikinnerulernissaat. Tamatumunnga pissutaavoq oqariartuutip aalajangersakkanut pioreersunut ilanngunneqarneratigut nutaamik immikkut ittumik paasisitsiniaanermik pilersitsisoqarneranik akikinnerussamat.

Suliffeqarfiit qaqorsaatinik kingunerutinillu atuinerat pisiniartarnermi politikkit immikkut piumasaqarnani paasisitsiniaanikkulli kaammattuinnikkulli sunnerneqarsinnaasut Naalakkersuisut allannguutissatut siunnersuuteqarnerminni isumaqartut ataatsimiititaliamit maluginiarneqarpoq. Taamatuttaarlu 2012-miilli eqqiaanermi neqerooruteqartitsinermi eqqiaanermi atortut avatangiisimut mingutsitsinngitsut tipigissaatinillu akoqanngitsut atorineqartarnissaanik Naalakkersuisut piumasaqartarsimasut ataatsimiititaliamit maluginiarneqarpoq, kiisalu kommunit tamanna ukkatarigaat aammalu periarfissaqartillugu peqqissaavinni eqqiaanermut atortunik avatangiisinut mingutsitsinngitsunik

tipigissaatitaqanngitsunillu atuisut.

3. Siunnersuutip aningaasatigut kingunissai

Aalajangiiiffigisassatut siunnersuutip piviusunngortinneqarnerani aningaasatigut allaffissornikkullu kingunerisassat siunnersuummut tunngavileruummi allaaserineqassasut Inatsisartut suleriaasianni § 33, imm. 1-imi allassimavoq.

Siunnersuutip piviusunngortinneqarnerani aningaasatigut kingunissaritinneqartut siunnersuummi ilanngunneqarsimasut ataatsimiititaliamit maluginiarneqarpoq, tamatumunngalu allatut oqaaseqassalluni ataatsimiititaliamit pisariaqartinneqanngilaq.

Tamatuma saniatigut ataatsimiititaliamit maluginiarneqarpoq Naalakkersuisut allannguutissatut siunnersuuteqarnerminni allaffissornikkut aningaasatigullu kingunissaritinneqartut ilanngussimannngikkaat. Tamatumunnga atatillugu oqaatigineqassaaq taamatut nassuiaasiornermi tamanna piunasaqaataanngimmat. Allannguutissatut siunnersuummi saqqummiunneqartumi aalajangiussassatut siunnersuummi aalajangersakkat iluini suliniutit ilanngunneqarniartut, taamaattumillu naatsorsuutigisariaqassasoq aningaasatigut imaluunniit allaffissornikkut kingunissaritinneqartut killiqarnissaat ilanngullugu ataatsimiititaliamit nalilerneqarpoq. Annertunerpaamik taakku tassaassapput Pinngortitap Illersuisuinik paasisitsiniaanerup annertusineqarnissaa, taamaattumillu naatsorsuutigineqartariaqarluni allaffissornikkut aamma aningaasatigut killissaritinneqartut annikinnerunissaat.

4. Ataatsimiititaliap inassuteqaataa

Siunnersuutaqqaartoq akuerineqassasoq ataatsimiititaliap isiunaqatigiittup inassutigaa.


Taamatut oqaaseqarluni isumaliutissiisummilu allassimasunut paasinnilluni matumuuna ataatsimiititaliap siunnersuut aappasaaniigassanngortippaa.




Aqqa Samuelsen
Siulittaasup tullia



Nikkulaat Jeremiassen
Siulittaasoq



Mikivsuk Thomassen



Simigaq Heilmann